



05.10.2022

UKA2022/118

Jens NapâtôK', Naleraq

## **Uunga siunnersuut: Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuut.**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerineq:**

Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuut Ilinniartitaanermut, Kultureqarnermut, Timersornermut Ilageeqarnermullu Naalakkersuisup saqqummiussaanut Naleqqamiit imatut oqaaseqaateqassaagut.

Siunnersuummi Eqqumiitsuliornikkut suliaqartut ataqqinaammik tunniunneqartartumik ukiumut 250.000 kr. angullugu aningaasartaqarsinnaasumik ukiunut qulinut atuutussamik siunnersuut toqqammavimmigut imaqarpoq, taamatullu agguaaassinissamut inatsisitigut tunngavissiinissamik kissaateqarnermik aallaaveqarluni.

Inuit taamatut ataqqinaammik tunniunneqartartunik tunniussisarsinnaanermut periarfissinneqartussat qularutissaanngitsumik amerlasinnaapput sineriatsinni isorartoqisumik sumiiffikkaartumik najugaqartut. Sisamaannaanerat Naleqqami eqqartorsimavarput tunioraasarnissallu nalilersorneqartarnissaat aallaagivalugu qitiusumi ataasiakkaanik inissisimannginnissaa nalersorluartariaqartut ilaattut isigalutigu inuit ukiumut sisamaannaat innersuunneqarsinnaanerat uggoraarput isumaqaratta sineriapput tamaat isigalugu aqqiniartoqarsinnaagaluarat.

Periarfissaasinnaattut ilaattut innersuukkusunnarpoq kommunikkaartumik inissisimasoqarsinnaanera, tassanilu taamatut kommunikkaartumik tunniussinissami sineriammi inoqarfiit tamarmik isigalugit aaqqiineq pisinnaappat, tamatuma kingunerissavaa inuit tallimat ukiumut tunineqartalernissaat.



Taamatut nunarput tamaat isigalugu aammalu siamassissumik ataqqinaammik tunniunneqartartartunik tunniussisoqartalernissaa kaammattuutigisarput neriutigaarput ataatsimiititaliami nalilersorluarneqarsinnaassasoq taamatullu tamanna Naalakkersuisup aqutissiorlugu naleqqussaaqqissinnaassasoq suliap naammassiniarlugu ingerlatseqqinnerani.

Taamatullu tunniunneqartartut inatsisitigut kalluarneqarsinnaajunnaarlugit aaqqissuunneqarnissaat kaammattuutigerusupparput, tassa attartortakkamik ineqarunik ininut tapiutaasartunut sunniuteqapiluutaangitsumik neriuppugut aaqqinneqassasut, taamaasillunilu tamatuma kalluarsinnaasaat assigiingitsut ataatsimiititaliami sukumiisumik eqqartuiffigissagaat neriutigaarput.

Ataqqinaammik aningaasat tunniunneqartartussat aporfeqangitsumik aammalu ulluinnarni atugaanut sunniuteqaateqangitsumik isertitatut inissinnagit aqutissiorneqarnissaat Naleqqamiit kaammattuutigaarput, sumummi iluaqutaassava tuneriarlugit allatigut sunniutipiluuteqarlutik ulluinnarni inuunerannut tapinut allanullu ajornerusumik inissiissappata, soorlu tapiisarnerni allani tamatuma ajornartorsiutaasarnera takoreernikuugippuk taamaammallu tamatuma pinnginnissaa anguniarlugu suliaq peqqissaarullugu suliarineqarnissaa kissaatigaarput.

Eqqumiitsuliortunut ataqqinaammik tunniussineq ataqqinaataasumik tunniussassaq allanik kallaananani tunniunneqartarnissaa taamatut kaammattuutigalutigu siunnersuut ataatsimiititaliami susasaqartumi peqqissaartumik suliarineqarnissaa Naleqqamiit innersuussutigaarput.